

Hotel na San Nicolas ta sigui awor cu a aproba e mapanan

ORANJESTAD (AAN): Den un entrevista di DIARIO cu Marlon Croes, kende ta director di DOW, el a elabora tocante e ultimo desaroyonan den e planning di e hotel na


Baby Beach, San Nicolas.

E ultimo acontecimiento ta e aprobacion di e mapanan di diseño di e parti comercial pa cual algun cambio tabata necesario. Esaki a tuma luga dos

siman pasa, tanten cu e parti di hotel mes tabata aproba caba, Marlon Croes a bisa. Loke ainda falta ta pa e desaroyadornan suministra algun informacion manera e “tekening”

pa Brandweer y “constructie-etenkeningen” cu mester worde controla pa DOW. E mapanan di permiso di construccion a worde entrega caba.

Croes a splica cu si tur cos



bay bon y tur e documentonan worde entrega den e formato corecto lo tuma tres pa seis luna pa e aprobacion di e parti di hotel. Den e ultimo combersacion cu e tabatin cu esunnan encarga cu e hotel, por a nota cu nan interes pa establece nan hotel na Aruba ta sigui halto, el a agrega.

El a confirma cu e hotel no lo ta tumando ningun parti di e beach mes, pero ta ubica den su totalidad riba e “cliff”. E compania a pidi pa “richt in” e beach pero Baby Beach ta keda un beach publico. Pa loke ta trata e Santana di Cachó e discusionnan ta andando ainda y ningun decision a worde tuma ainda.

Na momento cu un hotel establece su mes den un area lo tin cambionan di e caretera y e bista, unda cu e bisindario lo conoce un parti tambe di embeyesimento como parti di cambionan den infraestructura, esaki no lo ta diferente den caso di e hotel nobo aki.

E hotel lo cuminsa cu 300 camber. DIARIO a puntra Marlon Croes con ta para cu e situacion di e refineria, si e compania por a haci cualkier expresion tocante e presencia di esaki y si nan decision tocante establecimiento di un hotel na Baby Beach lo por cambia di e refineria habri back.

E director di DOW a bisa cu un refineria naturalmente ta un obstaculo pa operacion di hotel, pero den e caso specifico aki e inversionistanan a tuma e derechonan di opcion riba e tereno conociendo cu tin e refineria na e parti p’abao y pues ta acepta cu e refineria t’ey na e momento ey. “Naturalmente si e refineria no t’ey pa nan ta un pluspunt, si e refineria keda nan mester ta consciente cu nan a acepta boa di e condicionnan cu e t’ey,” Marlon Croes a subraya.

Tocante di e edificio ubica na fin di caya grandi di San Nicolas cu mester a bira un hotel, Croes a bisa cu structuralmente e edificio ta bon traha, pero e ta un “molester pa wowo” pa loke ta trata e parti di estetica. Esaki ta algo cu e team specialisa di DOW ta trahando ariba. E team ta wak edificionan cu tin un parti estetico cu no ta pas den e bisindario di e edificionan y ta papia cu e doñonan pa corigi esaki pa e medio ambiente rond di e edificio bira miho.